

SCRIPT OF MORNING GOJRI NEWS BULLETIN 2JUNE 2025 1015HRS

مارننگ گو جری نیوز بلیٹن مورخہ 2 جون 2025

یوہ آکا شوانی جموں ہے عبیدالرحمان تیں خبر سُنو۔

PM IATA

وزیر اعظم نریندر مودی اج نوی دہلی بھارت منڈاپم مانہ بین العقوامی خلائی آمدرفت تنظیم غی 81 ویں سالانہ جنرل میٹنگ مانہ شرکت کردیں غا جناب مودی اُت موجود افراد نال خطاب وی کریں گا بین العقوامی خلائی آمدرفت تنظیم غی طرفوں یہ سالانہ تقریبات گزشتہ روز شروع کی گئی تھی تے آئندہ کل یہ تقریبات اختتام پزیر ہو جئیں غی۔ واضع رہ کہ عالمی خلائی آمدرفت اجلاس غے دوران جہازاں غی صنعت غی معاشی صورتحال ہوائی رابطاں تے ہوائی صنعت مانہ استعمال ہون آلا تیل تے کئی دیگر معاملات ور تبادلہ خیال وے۔

SPEAKER MEETING

جموں کشمیر قانون ساز اسمبلی غا سپیکر عبدالرحیم راتھر اج حالیہ عرصہ مانہ تشکیل دتی گئی 9 ہاوس کمیٹیاں غا 1 چئیرمین پرنسز غی میٹنگ طلب کر رہیا ہیں اس میٹنگ غو مقصد اسمبلی ضابطاں غے تحت مالی تے دوجی کمیٹیاں غا کام کاج غو جائیزو لینو ہے اس میٹنگ مانہ شام لعل شرما شمیم فردوس علی محمد ساگر سجاد غنی لون محمد یوسف تارے گامی سرجیت سنگھ سلاتھیہ نظام الدین بٹ حسن مسعودی تے پیرزادی فاروق احمد شاہ شامل ریں گا ان ممبراں تیں علاوہ پرنسپل اکاؤنٹنٹ جنرل تے عام انتظامیہ محکمہ غا سیکرٹریز تے کئی اعلیٰ حکام نانہ وی اس میٹنگ مانہ شامل رہن غی ہدایت کی گئی ہے۔

CS KHEER BHAWANI

چیف سیکرٹری اٹل ڈلو نے گزشتہ روز گاندربل مانہ ماتا کھیر بھوانی مندر غو دورو کیو تے درشن کیا انہاں نے میلہ غا حفاظتی انتظامات تے دیگر چیزاں گو جائیزو لیو تے مقامی افسراں تے لوکاں غے نال ملاقات کی تانجے یاترا پُر امن طریقہ سنگ وے جموں کشمیر پولیس غاچیف نلین پر بھات نے وی مندر غو دورو کیو تے انتظامات غ و معائینو کیو حکام غے مطابق یاتریاں غی حفاظت تے رہائش غا مکمل انتظامات کیا گیا ہیں اسی دوران کڈا حفاظت مانہ 60 بساں ور مشتمل قافلہ مانہ ہزاراں غی تعداد مانہ کشمیری پنڈت وادی در روانہ ہوا تانجے 3 جون مانہ میلہ مانہ شرکت کرسکیں۔

JAMMU TOURISM

جموں کشمیر محکمہ سیاحت غی طرفوں 2 جون تیں 5 جون توڑی سٹارز نے دا ٹاون عنوان غا شہار نال جموں غے اندر رنگا رنگ ثقافتی تے کمیونٹی تقریبات غوانعقاد کیو جارہیو ہے اس سلسلہ مانہ اج ستواری غا امنترن ریزاٹ مانہ دوگری کھان پین تہوار منعقد ہورہیو ہے اس تیں علاوہ پہلگام حملہ مانہ شہید ہویا افراد تیں علاوہ سرحدی گولہ باری مانہ ہلاک ہویا افراد تے بھارتیہ فوج غا شہید ہویا جواناں نانہ وی موم بتی غی روشنی جلا گے خراج عقیدت پیش کیو جے غو 3 جون نانہ عالمی بائسائیکل تہاڑہ غا موقعہ

ور پتنی ٹاپ گا مقام ور ایک تقریب وی منعقد کرائی جارہی ہے تانجے جسمانی تندرستی تے صحت متعلق بیداری عام کیجاسکے 4 جون نانہہ بدھرواہ غے اندر مقامی فنکاراں غے زریعے ایک ثقافتی شام غی تقریبات منعقد ویں غی اس تقریب غو اختتام 5 جون نانہہ عالمی ماحولیاتی تہاڑہ گا موقعہ ور پتنی ٹاپ مانہہ کیو جے غو اس دوران مقامی رہائشیاں تے سیاحاں نانہہ اس تقریب مانہہ شامل ہون دعوت دتی جے۔

LAVENDER FESTIVAL

بھدرواہ غے اندر چل رہیا لاوینڈر تہوار غے دو جے تہاڑے اج وستے کئی اجلاس رکھیا گیا ہیں جن مانہہ براہ راست تربیت اروما اشیاء یونٹ غو دورو تے تکنیکی اجلاس شامل ہیں گزشتہ روز شروع ہوا اس تہوار غو افتتاح مرکزی وزیر ڈاکٹر جتندر سنگھ نیکیو تھو یوہ تہوار اج اختتام پزیر وے غو تے اس غو مقصد بھدرواہ علاقہ نانہہ عالمی ارومیٹک نقشہ ور متعارف کرانو تھو۔ اس موقعہ ور بڑی تعداد مانہہ کساناں شراکت داراں تے سیاحاں نے اپنی شرکت درج کرائی ہے۔

VIKSIT KRISHI RAJOURI

زراعت شعبہ غی ترقی خاطر ایک برا قدم غے طور ور وکست کرشی سمپرک ابھیان کساناں نانہہ زراعت شعبہ نال جڑیا ساینسداناں تے دیگر محکماں غا حکام نال جوڑن مانہہ اہم کردار اد اکر رہیو ہے اس مہم غو بنیادی مقصد کساناں نانہہ جدید ذراعتی تکنیکاں تے سرکاری اسکیمیاں متعلق بیدار کرنو ہے اس سلسلہ مانہہ ضلع راجوری غا ڈانگری علاقہ تیں تعلق رکھن آلا کساناں نے کرشی وگیان کیندر راجوری تے دیگر محکماں غا ماہرین نال ملاقات کی تے اس گل بات غے دوران ان کساناں نے ماہرین غی صلاح تیں علاوہ اداراں غا امدادی نظام ور وی تبادلہ خیال کیو۔

IPL CRICKET

پنجاب کنگز نے ممبئی انڈینز نانہہ کوالیفائر 2 مانہہ 5 وکٹاں تیں ہرا غے فائنل مانہہ جگہ بنا لی یوہ مقابلو احمدآباد غا نریندر مودی سٹیڈیم مانہہ کھیڈیو گیو۔ ممبئی انڈینز نے 204 دوڑ غو ہدف دتو جس نانہہ پنجاب

کنگز نے ایک اوور باقی رہتا واں 5 وکٹاں غا نقصان ور پورو کیو کپتان شریس ایر نے شاندار ناقابل شکست 87 دوڑ بنایا۔ ہُن پنجاب کنگز پلک فائنل مانہہ رائل چیلنجر بنگلورو غے خلاف اپنو پہلو ٹائٹل جتن گی کوشش کرے غو۔

ANNOUNCEMENT

علاقائی خبراں آلا شعبہ آکاشوانی جموں غی طرفوں ضلع کٹھوعہ واسطے عارضی نامہ نگاراں یعنی پی ٹی

سی واسطے درخواست منگی گئی ہیں۔ مجوزہ پرفارمہ ور عارضی نامہ نگار غی پوسٹ مانہہ دلچسپی رکھن

آلا ایسا امیدوار درخواست دے سکیں گا جہیڑا ضلع کٹھوعہ گا بسنیک ویں تے اُن غی عمر 24 براں تیں

براں غے بشکار وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا 50 صحافت غا شعبہ

مانہ ڈگری یافر تسلیم شدہ یونیورسٹی تیں گرجویشن غے ہمراہ 2 براں غو صحافت مانہ تجربو مقرر کیو گیو ہے۔
اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہ تجربو وی ضروری ہے۔ عارضی نامہ نگار غی پوسٹ مانہ دلچسپی رکھن آلا امیدوار واسطے لازمی ہے جے ضلع صدر دفتر کٹھوعہ یا اس تیں 10 کلو میٹر غادائرہ غے اندر رہائش پزیر وے اس سلسلہ مانہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ آکاشوانی پنچترتھی جموں مانہ بزات خود آئیندہ جون توڑی دے سکیں۔ اس بارے مزید جانکاری ویب سائٹ 15 ور دستیاب ہے۔ www.newsonair.gov.in
